



# A NOSA BISBARRA



VERÁN 2010

Donativo 6€

Nº 20



Teño visto ficar no camiño varias publicacións deste tipo, quizais esta perviva polo empeño que lle poñen estas persoas, e quizais tamén polo formato escollido, pola convivencia publicación-pobo, xa que aquí o pobo é o protagonista, os seus saberes e historias vense plasmados nos textos e nos copiosos retratos

que tamén aportan. Dende aquí felicito aos promotores desta idea, cos desexos de que "A Nosa Bisbarra" siga enchendo de cultura todos os recunchos desta contorna.

# VIANA

CULTURA - OPINIÓN - ACTUALIDADE



# ECOLOXISTAS E MEDIOAMBIENTE, ESTÁN LEVANDO Á RUÍNA AOS GANDEIROS

Esto é, unha reivindicación dunha gandeira titular dunha explotación prioritaria, ecolóxica e, en zona desfavorecida. O meu ganado son ovellas a maioría galegas en perigo de extinción, polo que son unha loitadora na súa recuperación e conservación, amo os meus animais por riba de todo e sinto un tremendo respecto pola natureza, polo que eu esixo que, se me respecte de igual forma a min e aos meus animais.

O día 28 de marzo do 2010 cámbiulle de pasteiro ós doce machos que teño para cubrir as 400 ovellas da miña explotación, desparasiteinos e metinos nunha parcela da finca que teño ao pé da nave. Como fixe sempre deixei alí e cando fun ó día seguinte para darlles de beber atopeime que entrara o lobo e me fixera unha desfeita, había cinco mortos, tres deles comidos e os outros sete feridos, dous deles moi graves. Ninguén se pode imaxinar a grandísima impotencia que sintes cando atopas ós animais que tanto sacrificio che custou criar e velos espenachados e feridos coas tripas fóra e sen poder facer nada para salvarlles a vida e ter que presenciar tantísimo sofrimento que che parte o corazón.

Agora que ven a época das cubricións para os partos da navidade, que macho lles boto? Veñen os protectores do lobo a solucionar o problema, o vou a buscar sabe Deus a onde sementais, sen saber que problemas poden meter na explotación?, quen me quita a min o estrés que sinto cada vez que estando co rebaño se espantan as ovellas e empezo a suar e tremer pensando se será o lobo?, que calidade de vida me agarda si nos cercados que tanto esforzo me custou facer para poder ter algún día libre, agora non poden deixar o gando só?



*Unha door, ver asina os animalíños!!*

Cando chamas para que veñan a avaliar os danos, o primeiro que che din e que non toques nada ata que pasen os axentes, porque senón igual manipulas as probas, inda por riba. Trátannos como se nós fosemos os delinquentes e claro os animais feridos que aguanten, tíñanos que atacar a eles, os que os botaron e defenden, haber se lles botaban un par e esperaban ata que eu fose a socorrelos.

E as protectoras de animais. Como é que non ven iste maltrato? Ou é que só é maltrato a vara do pastor? Ou as banderillas do toro? Que che coman un animal mentras está vivo, sacarlle as tripas, reventarlle os testículos, furarlle o pescozo, etc. Eso non é maltrato? Ou é que as ovellas non son animais? Polo visto estamos criando para manter a catro alimañas, aínda que as alimañas máis grandes, son os que os botan.

A min non me parece mal que queiran manter todas as especies de animais que se poda, pero non a nosa conta, que os manteñan os ecoloxistas e os de medioambiente, que habiliten zonas específicas para eles, incluso os gandeiros podiamos cooperar dándolle todo o desvelle do noso gando, pero que non nos veñan a quitar o noso pan da maneira que o están facendo.

Quero que quede claro, que eu son unha auténtica defensora dos animais, e sobre todo das razas en perigo de extinción, proba delo é que eu teño ovella galega, galiña de Mos e porco Celta, pero non llas levo as fincas, nin as casas dos ecoloxistas para que me as manteñan. E non nos olvidemos da sanidade, ben que nos obrigan a sanear, vacinar e desparasitar ó noso gando, quen garantiza que os depredadores non están contaxiando enfermidades e parasitos a meu gando?



*Nieves e Xesús, o seu pai...  
Que xa está "no alto", lembrámoste*

*Meus animalíños queridos! Que tristura!*



*A Señora Sara, a Adela e a Gerarda ensinan aos máis novos a espallar*



*O José Manuel, un artista, cargando o carro*



A miña maneira de ver sodes pior que o lobo, porque botades un animal que mata por pracer, non para comer, só como din moitos, mentras hai animais vivos mata todos os que pode, logo come ata fartarse, e o resto queda por alí esparrado. Se isto non é un asesinato que veña Deus e o vexa, pero os asesinos máis grandes son os organismos que permiten e ordenan botulos, claro eles están a salvo nas súas oficiñas, coa calefacción e o aire posto e cobrando o que nós lles pagamos, que máis lles dá afundirmos económica e moralmente?



*O palleiro que bonito velo neste tempo*

E que non se lle ocorra a ningún gandeiro atacar o lobo por defender o seu gando, nin decir que hai que desfacerse del que te levan preso.

Algúns deles dinche: non sei de que vos os queixades se vos pagan os danos, inda por riba con guasa. De que me valen a min os cartos que me dean (que xa veremos canto e cando) se me quedei sen sementais seleccionados pra o meu gando.

Tamén che comentan: para eso os dan subvencións, para mercar cans e para facer cercados.

E digo eu: cantos cans teño que mercar para que se enfrente cunha manada de lobos como a que atacou aos meus carneiros? E os peches: e aínda que o subvencionan porque así as ovellas non poden escapar e o lobo prea a gusto porque onde tiña eu os carneiros está valado con estacas de formigón, alambre, avelleiro, un arame de espiño polo fondo e outro por riba, como temos que pechar? Supuestamente vivimos en democracia e permítesenos expresar libremente, pois ben, hai vai o que eu penso.

Insto a quen lle compite que analice as grandísimas perdas económicas que os gandeiros sufrimos a causa dos ecoloxistas e medio ambiente, eles amenazan a supervivencia de múltiples explotacións gandeiras, tamén terían que evaluar o grandísimo abuso de poder que exercen estes que permiten botar lobos. Poñan en practica medidas adecuadas para paliar este problema, porque o goberno non está só para pedir os votos cando son as eleccións, teñen a obriga de apoiarnos e defendernos ante semellante lacra. Porque non queiran facer crer que queren

fixar poboación no rural actuando desta maneira. Que se dan axudas, que se hai igualdade, que hai progreso na actividade agrícola e gandeira, todo mentira.

Inda por riba quéixanse que cada vez hai menos homes e mulleres que levan a cabo labores agrogandeiras. Se eles son os responsables. Sembramos os cereais, coidamos a viña e mesmo as pradeiras, ven o xabril e desfaiete todo, criamos o gando, ven o lobo e matachelo, como vai haber relevo xeracional? Imposible.

Cal é a prioridade perante a Consellería do Medio Rural? A supervivencia do lobo o a dos gandeiros? Porque as dúas xuntas é imposible.

Esiximos protección, que en definitiva é a súa obriga; pensen que os gandeiros somos os que fixamos poboación no rural, acadámola terriña. E producimos o alimento para todos, que de pouco lles vai a valer ter moitos lobos cando non quedemos gandeiros que teñamos gando, van a ter que comer a xente.

**NIEVES FERNÁNDEZ VIDUEIRA**

**Non todas van a ser tristuras. Xeiras, xuntanzas, que por sorte aínda conservades. Tes toda a razón, Neves, querémoste!**



*Quintela do Pando. Xuntouse o pobo enteiro para facer a malla e a seitura tal e como facían os nosos antergos. É como en tempos! Despois da xeira compartimos en harmonía comida, lembranzas e ledicia.*